

Celebrando 15 aña den mundo di entretenimiento

ORANJESTAD - Dia 13 di Maart 1994, den Cas di Cultura, soño di un mucha ta bira realidad, na momento cu e ta subi escenario pa prome bes pa participa den un festival y presenta dilanti di un publico, cu pa e mucha aki tabata e publico di mas grandi cu el a yega di mira su dilanti. Poco por a imagina cu awe e mucha aki lo por a crece y bira un di e artistanan mas exitoso cu nos isla conoce.

Edjean Semeleer su carera ta cuminsa oficialmente cu su participacion den e festival escolar “Voz-i-Landia”. Un festival cu hopi ta corda, di un nivel superior cu tabata e comienzo di varios cantante excelente di nos isla. Despues di e festival aki, oportunidadnan grandi a keda presenta pa Edjean. Cu e guia y apoyo di su mayornan y di su manager di e tempo ey, Sr. Roy Olive, nan a haci bon uso di e oportunidadnan ey.

Exito tras di exito, presentacion tras di presentacion y hopi otro experiencia mas, ta loke a forma Edjean como artista y a tres’e caminda cu e ta awe. 15 aña despues di e participacion di Edjean den Voz-i-Landia, nos por mira atras riba su CDnan exitoso cu el a pone riba mercado, su presentacionnan memorable cu por ehempel Pedro Fernandez, Mariachi Vargas de Tecalitlan, Tony Sherman, Edwin Abath y Nancy Ramos, premionan prestigioso manera “Den Ambiente Awards”, “Premio Motito y Rufo Wever”, conciertonan inolvidable, y un sin fin di logro y proyecto mas.

Cada fanatico tin un recuerdo specifico di su experiencia cu e artista aki. For di chikito Edjean ta ganando curazon di hopi, pero tambe respet unda cu e bay, no solamente pa e forma cu e ta presenta su mes como artista pero tambe pa e forma cu e ta trata tur ser humano cu e encontra den su caminda.

Edjean ta un ehempel bibo di un artista hoben cu no ta limita su mes na nada. El a demostra cu un persona por tin soñonan casi imposibel, pero cu ta traha cu disciplina y consistencia y na final ta logra su meta cu na principio tabata e soño cu pa otro a mustra imposibel.

For di aña 2007 Edjean ta wordo maneha pa Imedjean Productions, y for di e aña aki tambe por a nota un desaroyo acelera di e artista aki pa loke ta su proyectonan. Mirando cu e aña aki ta uno hopi importante den e carera di Edjean, a wordo dicidi cu e lo bira un temporada di celebracion pa conmemora 15 aña impresionante di carera musical y artistico.

E celebracion aki ta cuminsa dia 23 di Mei proximo y lo sigui te cu fin di aña cu proyectonan sumamente alentador. Hopi compania local a mira importancia di e logro aki, ya cu pa cumpli 15 aña cu consistencia den e mundo artistico aki no ta algo facil, y asina nan ta mustrando masha interes pa uni na e celebracionnan aki. Pesey tambe Imedjean Productions kier gradici esnan cu ya caba a confirma nan participacion pa cu proyectonan special di Edjean.

Por ultimo un gradicimento inmenso y special ta bay na tur persona y compania, pero specialmente tur fanatico di Edjean, cu a apoya y kere den e talento local aki. Hunto sigur nos tur lo recorda y celebra 3 lustro di un yiu di tera su soñonan cu semper el a comparti cu su pueblo. “E hendenan cu semper el a stima y tin pega na su curazon”.

Den nos edicion special di mayan bo lo por lesa mas di e proyecto sumamente special cu Imedjean Productions hunto cu Westin Resort tin prepara pa Aruba pa dia 23 proximo, pa asina cuminsa celebra 15 aña di excelencia den mundo di entretenimento di e cantante exitoso aki.

